

REGIONAL NEWS BULLETIN

HEADLINES (EVENING)

- 1. Ni 14 awh Mizoram Legislative Assembly pakuana, thut khawm vawi li-na, Budget Session chu zanin hian tih tawp a ni ang.
- 2. Central YMA leh ZORO ten Manipur a Zofa unau kara inhriatthiamlohna thleng chinfel thuai ni se an ti.
- 3. Chhatisgarh-a Maoist leh sipaite inkahnaah Maoist 30 kahhlum an ni.
- 4. Union Home Minister Amit Shah-a chuan Narendra Modia sawrkar chuan Naxalites te lakah zahngaihna nei miahlovin hma a la tih a sawi.

<><><>

BUDGET SESSION

Ni 14 awh Mizoram Legislative Assembly pakuana, thut khawm vawi li-na, Budget Session chu zanin hian tih tawp a ni ang.

Assembly rorel inkhawm kal mek hi thla hmasa February ni 19 atanga tan niin, vawiin hian a tawp tawh dawn a. Tun thla ni 4 khan Finance changtu Chief Minister Pu Lalduhoma'n assembly a tangka kum thar (2025-2026) atana Mizoram sum ruahman cheng vaibelchhe 15,198 leh nuai 76 a pharh chu vawiin hian pawm fel hman tur a ni a. Kumin tangka kum kal lai mek (2024-2025) chhunga sum dil belhna leh a behbawm dang, supplementary demand for grants cheng vaibelchhe 3,512 leh nuai 33 chu March ni 5 khan assembly hian a lo pawm tawh a ni.

Finance changtu Chief Minister Pu Lalduhoma’n “The Mizoram Appropriation (Demand for Grants 2025-2026) Bill, 2025” a pu lut leh ang a, hei hi pawm tura dil a ni bawk ang.

<><><>

MEMBER NOTICE

Vawiina Assembly rorel inkhawmah Hachhek bialtu MLA, Pu Robert Romawia Royte chu thil pawimawh sawina hun pek a ni a, Phuldungsei khuaa mi 85 Ration Card paihsak tawh te thun an nih leh theih nan House-ah rawtna a thlen.

He hunah hian Pu Robert Romawia chuan Phuldungsei khuaa cheng mi 85 te ration card RCMS dan anga adhaar card nena online kaltlanga thlunzawm tawh te chu Tripura sorkarin offline a ration card a pek tho an nih avangin kum 2024 khan heng mi 85 te hi an ration card a tihtawp sak tih sawiin, he thil thleng hi Politics zawnga a inpuhmawh lo leh a thawktu lam

dem lova, an ration card neih let leh theihna tura Mizoram sorkar chu hmala turin House-ah rawtna a thlen a ni.

Hemi chungchang hi Food, Civil Supplies & Consumer Affairs Department changtu Minister Pu B.Lalchhanzova chuan chhangletin, Hachhek bialtu MLA Pu Robert Romawia thu sawi chu thu dik lo vek niin a sawi a, heng mite tan hian theihtawp an chhuah tih sawiin, manual ration card pawh chhungkaw 21-a mi 85 tan an pe tih sawiin, thlatin AAY quota buhfai kg 35 chu a thlawnin chhungkaw 21 hnenah Mizoram sorkarin a pe tih a sawi a ni.

Supply Minister chuan, Tripura sorkar in Aadhaar authentication, RCMS an tih hmasak zawk avangin a ti tlai zawk Mizoram a buai tih sawiin, heng mi 85 te hi Tripura atanga in paih tura ngen an ni a, an inpaih tir duh loh avangin Mizoram sorkar chuan a khua leh tui humhim nan manual ration card a pe tih a sawi a, MNF kaihhruai sorkar hmasa chu lo che chak zawk se chu hetiang buaina hi a thlen a rin loh thu House a hrilh a ni.

<><><>

HEALTH MINISTER

Health Minister Pi Lalrinpuii'n SEDP hnuaia a nghet lova chhawr, Health Worker 265 leh Staff Nurse 30 ban an ni tih a sawi.

Vawiina Assembly rorel inkhawmah Health Minister chuan Hachhek bialtu MLA Pu Robert Romawia Royte zawhna chhangin MNF kaihhruai sorkar hmasa a mipui mamawhna avanga SEDP hnuaia a nghet lova chhawr Health Worker 265 leh Staff Nurse 30 te chu SEDP sum awm tak loh avanga ban an nih thu House a hrilh a ni.

Zawh belhna chhangin Health Minister chuan Non Practicing allowance, NPA chu hlawh a bet tlat, allowance chi khat a nih avangin a kaihhruai Health department-in a lo titawp thei ngawt lova, hetihruai hian dawng lo tur ten an dawn lohna turin ruahmanna an siam mek tih sawiin, hemi chungchangah hian Mizoram Government Doctor Association (MGDA) te nen pawh an inbe reng a, tun dinhmunah Doctor 62-in an NPA lak thin an titawp tawh a, rule 29 of MHS rules 2009-ah chuan doctor tumah private practice phal loh a ni a, hetihruai hian NPA an lak phal thung a ni a, hma an la chho mek tih House a hrilh a ni.

<><><>

HEALTH

Health & Family Welfare Department changtu Minister Pi Lalrinpuii'n Mizoram district hrang hranga damdawi in tichangtlung tur leh Health Worker, nurse leh specialist doctor la belh turin hma lak mek a ni a ti.

He thu hi vawiina Assembly rorel inkhawma zawhna leh chhanna hunah sawiin, Health Minister chuan Sub-Centre hrang hranga thawk turin sorkar chuan Health Worker 100 lak belh a tum a, DP&AR pawhin a phalsak tawh tih sawiin, Finance Department phalna an nghah mek thu House a hrilh a, zawh belhna chhangin Health Minister chuan Mizoram chung hmun hrang hranga primary health centre, sub-centre, health and wellness, district hospital, ZMC leh Civil hospital te chu tihchangtlun vek tum a nih thu sawiin, nurse leh specialist doctor tiamin thawktu hrang hrang lak belh a nih tur thu a sawi a, specialist doctor 9 an lak belh turah district thar te pawh an pek ngei a rin thu House a hrilh bawh a ni.

Minister chuan Health clinic centre chu MNF kaihhruai sorkar lai kum 2023 atanga sak tan niin, ruahmanna pawh ZPM sorkar hma vek a siam a ni tih sawiin, sakna tur sum cheng nuai 2, sing 9 chu finance dept lamin deduct tur hrang hrang an tih hnuah a sakna tur sum cheng nuai 2, sing 6 chauh a ni a, sum chu a beitham em avangin Health clinic centre-ah te hian hnathawh tur angin hna a thawk tak tak theih dawn lo ni-a a hriat thu a sawi a, Utilisation Certificate pek vek a nih tawh avang leh SASCI sum hmanga sak a nih avangin endik thut huna an buai loh na tura sa an nih thu sawiin, ZPM-in sorkarna a chan hnuah Health clinic centre 70 sak zawh tawh a nih thu House a hrilh a ni.

<><><>

CYMA& ZORO

Manipur a Zofa unau kara inhriatthiamlohna lo thleng chungchangah Central YMA chuan inremna a awm thuai theihnan a hma la turin Churachandpur District a hnam pual hruaitute a ngen.

Tunhnaia Manipura Zofa unau Hmar leh Paite te inkarah inhriatthiamlohna lo thleng chungchangah nimin khan Central YMA hruaitute chuan Hmar Inpui hruaitute leh Siamsin Pawl Pi (SSPP) hruaitute a kawm a, Churachandpur tualchhung buaina in Mizorama nghawng a neih lohna tura theihtawp chhuaha hma la turin a ngen a, Central YMA pawhin a theih ang angin hma a la a, remna leh muanna a awm theihnan hma a la zel dawn a ni, an ti.

Zo Reunification Organisation (ZORO), General Headquarters chuan tunhnaia Manipur-a Zofate inkara buaina chhuak leh chumi kaihhnawih a nunna chan an awm hial chu pawl a ti tak zet tih vawiin khan thuchhuah siamin a sawi a. Hliam tuar engemawzat an awm leh hmun him lam pana mahni in leh lo chhuahsan an awm hial te chu ZORO chuan pawl a ti tak zet a. Hetiang anga Unau kara buaina chhuak hi khawiah mah thleng nawn tawh lo se a duh a, Zofa hnamtinte hnenah a ngen a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

CS

Chief Secretary Pu Khilli Ram Meena chuan Lawngtlai District tlawhin, sorkar dept hotute a kawm a,

Lawngtlai DC Conference Hall-a meeting hi DC Pu Cheemala Siva Gopal Reddy an a kaihruai a, Chief Secy chuan Lawngtlai distrcit dinhmun tlangpui endik tura lo kal a nih thu a sawi a. Inkalpawhna kawng tha tawh lo veiawm a tih thu a tarlangin, kawng siam hnathawh leh enkawltute chu tan la thar turin a chah a. A bik takin Lawngtlai leh Zorinpui inkar kawng chu a pawimawh zual hle tih sawiin, PWD- te chu a enkawl kawngah chak zawka hmala turin a chah a, mipuite nen pawh tan leh thawhho thiam a tul hle a ti.

Chief Secretary chuan zirna lamah Lawngtlai district tan hmasawwna tur a tam hle tih a tarlang a. Mizoram chu za a za ziak leh chhiar thiamna State ni

mai thei tura a din mek laiin, Lawngtlaia 'literacy rate' a la hniam hle chu veiawm a tih thu sawiin, zir thiamna kawngah hmasawnna atak a hmuh a nih neih theih nan Education department- chu chak zawka hmala turin a chah a. A bik takin elementary education- ngaihpawimawh a tul zual thu a sawi.

Chief Secretary chuan Patanjali Foods Limited- ten Lawngtlaiah oil palm extraction centre- an din thuai dawn tih sawiin, oil palm thar chhuah lamah pawh tan lak a tul hle a ti a. Chumi atan chuan inkalpawhna kawng tha pawh a tul dawn a, theih ang anga hma la turin district houte a chah a. Thalaite tan 'skill development' lamah training tha tak pek a tul hle tiin, entrepreneur- tam zawk neih a tul ati a. An thil siamchhuah ang angte hralhna tur 'Market' ngaithuah sak kawngah district administration - te theihtawp chhuah turin a chah. Police department - te chu 'three new criminal laws' hrechiang hle tur leh a tul anga training - tha taka nei thin turin a chah a. Free Movement Regime (FMR) chungchang sawiin, dan ang taka hmalak a nih theih nan BSF, Assam Rifles leh District Administration- te thawkho thiam turin a fuih a ni.

Pu Khilli Ram Meena, chuan Lawngtlai District - hmasawnna tura Chief Secretary Office- an inhawn reng thu tarlangin, an harsatna neih ang angte thlen fo thin turin a chah nghal bawk.

<><><>

ENVIRONMENTAL NGOS

Mizoram Environmental NGOs Coordination Committee chuan Assembly House-a member ten ramngaw leh tuihna humhalhna kawngah mipuite rilru hruai kawi thei thil an sawi ni a sawiin, hengte hi record atanga paih tura hmala turin Assembly Speaker an ngen.

An ngenna lehkha hi vawiin khan Assembly Speaker Pu Lalbiakzama hnenah pe in, Mizoram Environmental NGOs Coordination Committee chuan ZPM member, Horticulture changtu Prof Lalnilawma, Power & Electricity Minister Pu F Rodingliana leh Chief Minister Adviser Pu Lalmuanpuia Punte ten ramngaw humhalh chuan tuihna a siam kher lo ti zawnga an thusawi te chu Constitution hnuaia mipui dikna chanvo bawhchhiatna leh palzutna niin a lang a ti a, Environment humhalhna kawnga Mizoramin kawng dik a zawh zel theihna tur leh sorkar leh hemi kawnga mi thahnemngaite hmalakna a kal tuan zel theih nan, heng an thusawi te hi paih ni se an ti a ni.

Mizoram Environmental NGOs Coordination Committee ngenna ah hian an President Dr Lalbiakmawia Ngente leh Gen Secy Vanlalhrima ten hming an ziak a ni.

<><><>

UNION HM

Union Home Minister Amit Shah-a chuan Narendra Modia sawrkar chuan Naxalites te lakah zahngaihna nei miahlovin hma a la tih a sawi. Pu Shah-a chuan sawrkarin inpe tura theihtawpa a thlem chung pawha la hel tlatte chungah chuan ngaihnathiamna nei miah lovin an che zel dawn tih a sawi a. Union Minister chuan social media-ah he thu hi tarlangin Naxal Mukt Bharat Abhiyan tana kawng dik an zawh tan tih sawiin nakum March ni 31 ah chuan Naxal helho nuai chimih vek an ni ang tih a sawi a ni.

<><><>

MAOIST

Chhatisgarh-a Maoist leh sipaite inkahnaah Maoist 30 kahhlum an ni. Bijapur district-a Bastar division ah security force ten an thudawn bawhzuiin helho dapchhuah hna an tawh a. Bijapur leh Dantewada district inrina ngaw chhungah helho an awm tih hriat niin hemi bawhzui hian security force te an che chhuak nghal a. Tuki atang khan inkahna thlengin sipaite hian Maoist hel 26 an kaphlum tawh nia thudawn a ni. Hetihlai hian vawiin vek khan Kankar district-ah Maoist leh sipaite inkap bawkin Maoist 4 kahhlum an ni.

<><><>